

宋文鑑卷第三十四

制

除趙普門下侍郎同中書門下平章事集賢殿大學士制
除呂蒙正中書侍郎兼戶部尚書平章事制

李沆

除文彥博判大名府制

歐陽修

除皇弟允初感德軍節度使制

歐陽修

封皇弟九女福安公主制

歐陽修

除皇兄允弼武康軍節度使制

宋祁

除皇弟允迪安靜軍節度使制

宋祁

立皇太子制

張方平

除皇兄宗諤保靜軍節度使制

張方平

除韓琦守司徒兼侍中鎮安武勝等軍節度使制

張方平

除呂公弼樞密使檢校太傅制

張方平

除李昭亮殿前副都指揮使靈武軍節度使制

張方平

除曾公亮檢校太傅充樞密使制

胡宿

除王德用樞密使制

胡宿

祁國長公主進封衛國長公主制

司馬光

立皇后高氏制

范鎮

曾公亮加恩制

范鎮

除富弼樞密使制

范鎮

兗國公主降沂國公主制

范鎮

韓琦加恩制

王安石

李璋加恩制

王安石

皇伯祖威德軍節度使榮國公承亮加恩制

王安石

李日尊加恩制

王安石

除趙普門下侍郎同中書門下平章事集賢殿大學士制
閔散同功歸馬遂隆於周道蕭張叶力斷蛇因肇於漢基必資佐
命之臣以輔興王之業推忠協謀佐理功臣樞密使光祿大夫檢
校太保兼御史大夫上柱國天水縣開國伯趙普功參締造業茂
經綸稟象緯之淳精契風雲之良會洎贊樞機之務屢陳帷幄之
謀沃心方佇於嘉猷調鼎宜膺於大用俾踐台衡之位仍兼書殿
之榮爾其罄乃一心熙予庶績君臣相正勿忘獻納之規夙夜在
公勉致隆平之化往服休命無愧前修

除呂蒙正中書侍郎兼戶部尚書平章事制

李沆

天道無私日月星辰助其照皇王丕宰股肱輔弼代其工所以端
拱守成垂衣制理永建丕平之景運遐追三代之令猷其有業茂
經綸才推謹厚參大政而已淹星歲秉至公而無捨寅昏宜頒出

綽之殊恩俾正持衡之重柄爰擇剛日特降命書推忠佐理功臣
朝散大夫給事中參知政事柱國東平郡開國男呂蒙正四氣均
和五行鍾秀有濟時之略輔之以溫恭挺命世之才守之以循默
爰覩舜旌之進善遂指魏闕以來儀臨軒覩敏贍之能射策見縱
橫之略暨茲登用益著謨明公忠推社稷之臣凝重見廟堂之器
眷茲大體久鬱具瞻屢宣作礪之功克懋秉鈞之績別錫褒功之
美號仍陞馭貴之崇階勲籍增榮井田加賦預列侯之峻爵同大
利之計書顧優恩之在茲諒名器之無假於戲雲從龍而風從虎
今也其時啟乃心而沃朕心必求諸道爾宜周旋庶政佐佑眇躬
緩茲宵旰之憂翊我隆平之運同底于道豈不美歟

除文彥博判大名府制

歐陽修

朕惟將相之崇資是爲文武之極選隆其名器所以重朝廷列于
蕃宣所以屏王室矧乃居留之任必屬老成之人爰擇剛辰敷告
有位具官文彥博器閎而厚識粹而明學得其方通古今而知要

才周於物適大小以惟宜自奮發於聲猷早更揚於中外居則參
裨乎國論出則宣暢乎皇威兩踐台司首當柄用賢愚式序舉百
職以咸修綱紀甚明贊萬幾而至悉自懇避鈞衡之任出司管鑰
之嚴逮此逾時蔚然休問眷言邦哲實簡予衷是用更其擁節之
榮委以別京之重勁兵所宿是資總制之權雅俗惟淳兼賴撫綏
之政於戲與國同體是謂股肱之良惟民具瞻方隆師尹之望顧
我舊德豈煩訓辭往其欽哉祇服休命

除皇弟允初依前檢校尚書右僕射充感德軍節度使加

食邑食實封餘如故制

歐陽修

爵賞當功則爲善之勸廣名器不假則至公之道存然而隆恩睦
親所以厚乎風俗建侯作屏所以扞于王家非余敢私乃國舊典
具官允初質性純茂稟乎天姿學問發明由於師訓維我叔父時
爲賢王緬懷遺烈之存屬乃克家之善自被蕃宣之寄久參朝請
之聯宜從留務之繁進委臨戎之重節髦並建并賦兼增僉謀允

諧寵數惟渥於戲干戈衛社內有宣勤夙夜之臣甲冑在躬外有奮力行伍之將爾其念宴安之懷毒知富貴之難居戒損於滿而罔敢自驕勞身以謙而克保其位無忘勗勵往服恩榮

封皇弟九女福安公主制

歐陽修

朕稽有國之彝章著皇女之稱謂取其主以同姓所以見王體之尊必也錫之美名所以彰禮命之寵載涓吉日敷告在庭皇弟九女岐嶷之姿有生知之異稟柔順之質得天性之自然方嚴保傅之規以養肅雍之德俾遵舊典褒以徽章嘉乃妙齡盛哉儀服考僉言而惟允非予意之敢私於戲隆仁恩以厚親茲惟教愛習圖史而循法繫乃夙成祗若訓言往膺優渥

除皇兄允弼武康軍節度使加食邑食實封制

宋祁

朕惟一二兄弟屏扞吾家每推骨肉之愛以強本根之託矧在邇屬早休厥聲適及剛辰進膺異數具官允弼甚德而度參仁以和

居貴而罔流心訓恭而遠祇悔間陪郊獻佐庀宗司抑抑攸儀舉
皆率履綽綽斯裕內無違言成予敘親時乃修職比者雖疏王爵
未厭寵名宜停後務之繁俾領元戎之制增食爰賦兼實幹封於
戲盤石而宗寄莫重焉扞城於國義莫先焉可壯非猷可順非迪
仍輟就藩之遠姑隆綏族之恩往惟懋哉顯對嘉命
除皇弟允迪安靜軍節度使加食邑實封制

宋祁

朕聞立愛莫先於親繁支實庇其本每念攸訓匪伊異人用推敦
序之典期光夾輔之體具官允迪承熹天祐衍慶宸筭舉動嚴方
趨占閑敏思長富貴之守寢肆朝夕之虔向留使華允穆公路頃
以王邸殂謝予懷悼驚念其堂構眷深橋梓維城有寄墨經還朝
載隆近屬之恩俾領中軍之節仍增邑食且實戶封於戲乃考之
忠勛四邦是式乃兄之光寵十乘有儀爾偕厥榮毋或茲忝欽卽
殊獎祇勵遠猷

立皇太子制

張方平

維我祖宗繼天統業積有功德克享上帝之心肆其子孫永承
百世之祀朕祗纂謨烈詳覽古今繫崇建於元良實保安於國本
上尊宗廟孝無大於奉先下庇生民教莫逾於居正式宣顯冊敷
告萬邦皇長子具官頊英粹日躋中和自至仁義充涵之美言動
惟時禮樂交錯之華威儀可象抑畏疏封之重敏修典學之勤亦
既多聞足當大受是宜誕膺徽命肇啟儲闈懋升明兩之輝益廣
在三之道非余私於爾頊惟天祐於余家衍寶祚之靈長成寔區
之慶賴往慎厥德以答揚我烈聖之光訓不曰休哉可立爲皇太
子有司擇日備禮冊命施行

除皇兄宗諤保靜軍節度使制

張方平

朕惟前王懿德治古舊章必隆蕃屏之親以穆懷柔之體矧居邇
屬夙著令名宜揆剛辰誕揚休命皇兄具官宗諤甚德而度參仁
以和近雅不流繹如鍾呂之正內明白炤瑩若珪璋之溫率履無

違在宗有裕特推恩典之異聿示表儀之光錫爾駢旄屬之瑞節
時庸褒敘式昭寵嘉於戲祇畏者保身之永圖恭儉者有家之長
業事近効遠罔或忽諸往惟欽哉尙克終譽

除韓琦守司徒兼侍中鎮安武勝等軍節度使制

張方平

朕光宅萬邦肇新駿命正權綱之遠御審名器之大方眷予宗臣
特崇異數以表圖勲之重用昭報禮之隆爰揆剛辰誕揚贊冊具
官韓琦宣昭賢業熙亮天工光翊三朝咸有一德材周五則之用
體備四時之和社稷是經文武惟憲在成功而弗處實有大以能
謙荐上奏封懇辭政柄顧倚毗之厚詔諭數頒而精懇之堅辭誠
難奪增寵上階之峻特開兩鎮之崇蔽自朕心事非舊典當盛辰
而均逸望故里以榮歸大業甚明休靈殊渥於戲臣行其志茲爲
自得之全君篤於恩深惜老成之去無安帥節之樂猶待袞衣之
還乃情本朝遐不謂矣

除呂公弼樞密使檢校太傅制

張方平

本朝之制地分二府之嚴執政之臣其幹庶邦之重文武承式兵民是圖屬在賢明總司使職誕敷明制敷告大廷具官呂公弼器蘊純明機靈精遠環材任重中廣厦之棟梁雅音自和合清廟之琴瑟登貳樞機之密洽聞議慮之長屢陳憂國之言多發便時之策深明王體有簡朕心宜陞帝傳之崇以正本兵之任爰田增賦眞食衍封名器益隆典章允穆於戲信而能用嘗思明哲之難知無不爲期盡臣鄰之益祇若休命以贊大猷

除李昭亮殿前副都指揮使宣武軍節度使制

張方平

外擁節旄方鎮元戎之重內司禁衛太微上將之雄匪時英材疇若嘉命圖用親率宜揚大庭具官李昭亮誠稟忠淳風力敏給世載其德有狐趙之舊勳文定厥祥迺姜任之高姓早階華顯允蹈中和入從法從之華出領翰垣之要屬以軍政契於士心訓撫有

方簡稽元肅眷殿巖之離衛悉王旅之選鋒典茲中權職在圻父
特賜節旄之命爰將注意之隆峻以等威統諸環列於戲齋鉞所
付是爲主之爪牙蘭鐙之嚴實曰予之心膺勉旃誠報茂對寵休

除曾公亮檢校太尉充樞密使制

胡宿

經遠慮微必慎制兵之術折衝消難亦資畫策之臣是憲樞躔聿
崇使號蓋政謨之攸寄匪耆哲而莫居適得其人誕敷厥命具官
曾公亮風業碩茂志慮深純學多貫於前言性頗滌於中道有方
重之德可以抑躁而鎮浮有明達之材可以造幾而成務當講勸
於左右亦召置於禁嚴博我訓言代予明命用請臨於宸輔遄擢
學於京師咸有治功遂聞政本通明練於百物參和穆於羣言貳
公之司久陪於論道內密之任宜正於筦樞仍加傳導之名更益
陪敦之數崇階馭貴真食衍封並示寵章式旌殊禮於戲典機之
任莫愼乎微擊柝之言蓋取於豫勿謂承平之久益思備禦之深
祗服斯言往踐乃位

除王德用依前檢校太師同中書門下平章事兼羣牧制

置使充樞密使河陽三城節度使加食邑實封仍改賜

功臣制

胡宿

內樞之地。上範於斗宮。前飭之籌。參寄於人傑。以經常武之事。是號本兵之司圖。冠厥名疇。總予務。乃眷元侯之長。早崇右府之聯。爰擇剛辰。復還舊物。具官王德用。志懷果烈。風概沈雄。通於奇正之謀。居然英傑之氣。春秋閱禮。韞義府以惟深。甲令書忠。載世家而有舊。比膺推轂。荐厯干城。先十乘以臨戎。長萬夫而觀政。德刑具舉。威惠參施。能名播於外夷。沈機隱於敵國。鄴咨俊望。擢典繁機。冀濟事功。迪宣忠力。孚乃誠而匪懈。研諸慮以惟微。旋均基宥之勞。亟樹藩宣之治。蹈險夷而一致。服忠孝而兩全。簡在朕心。洽於朝聽。是用升鳳池之寵秩。聯虎節之榮章。倚殿輔邦。用陪京室。屬右樞之闕職。咨羣岳以擇材。僉曰汝賢宜弼。予治蓋天子二老出以居。方伯之尊。寰內諸侯入則處。公卿之任。抑惟曩制。舉是隆

名用起壯猷使纂舊服仍峻雲臺之號兼增井牧之封式厚耆英
有加名數於戲樞機發令制戎事以惟艱樽俎折衝經人謀而匪
易往慎乃位益思其忠

祁國長公主進封衛國長公主制

司馬光

帝妹中行易象贊其元吉王姬下嫁召南美其肅雍命服亞正后
之尊主禮用上公之貴寵光之盛誰昔釋訓誰昔昔也而然矧同氣之至
親推異數而何愛祁國長公主席靈長之緒承濬哲之祥稟乾坤
之粹和鍾日月之明潤淵懿可度柔嘉有章志女功而忘勞承師
教而不倦今王笄在首厭翟戒塗方結帨於皇家將執笄音煩於
士族宜疏沫土之邑俾適富平之孫庸展茂恩誕孚醲化於戲琴
瑟靜好式昭和樂之音雷風順承是爲常久之道勿以夫家之平
素有虧婦德之聽從祇服訓辭永綏福履

立皇后高氏制

范鎮

天子之有后如天之與地惠養萬物如日之與月臨照四方苟稱

號之弗崇則臣民之安仰京兆郡君高氏生闕閱之後而不自矜
大處富貴之習而能安素約服在藩邸宜于家室肆朕纘承嘉乃
輔佐惟長樂之奉養左右不可不虔惟六宮之表儀晨夕不可不
肅爰正軒星之位以爲國風之倡舉是典冊告於治朝於戲邦教
所基人倫茲重塗山啟夏太任興周勤勞一時焜燿萬世乃其總
笄櫛紒日侍慈顏衡紃紃紃時承宗祀庶幾天下之俗知我門中
之私

曾公亮加恩制

范鎮

朕觀前世之載考宗祀之文周漢舊章殘闕無次王鄭異說雜互
莫同大抵奉親以嚴率民以孝交神明於合莫厚風俗之本原具
官曾公亮執禮蹈方刺經援古燮均大化固已治平制定多儀又
皆節適四時之氣其和見于豆籩九州之力其精在于玉帛使朕
得昭升烈考哀對上靈誠意所通顧饗如答惟時顯相宜有褒
嘉峻階品所以明等威崇衣號所以懋功實陪敦多賦流衍真封

於戲大典越熙至恩胥暨惟裁成輔相以遂萬物之宜惟同負協
恭以收庶工之效庸昭況施永久基圖

除富弼樞密使制

范鎮

兵布于天下而至眾故統之有本元謀出於堂上而無窮故資之
於明哲是以基于靜密式暢遠猷始乎幾微能成大務若時付畀
茲謂劇艱前推忠協謀同德守正佐理功臣特進行禮部尚書同
中書門下平章事昭文館大學士監修國史兼譯經潤文使上柱
國河南郡開國公富弼文武相資柔剛並適誠貫金石材隆棟梁
往在先朝嘗爲上宰至言無隱精慮有開方國計之是毗以親
喪而遽去况夫西漢而下巨唐以還訖于本朝凡厥公相率就
起復以爲權宜而卿固執禮經懇辭恩詔三年始事四海具瞻再
炳台符之文兼崇樞極之任重陪多賦庸示褒章於戲天命甚難
神器至重始初纘紹正賴經綸幸元老之聿來偕眾賢而同濟庶
幾涼德罔累慶圖

兗國公主降沂國公主制

范鎮

陳車服之等所以見王姬之尊啟脂澤之封所以昭帝女之寵茲
惟親愛之攸屬時乃風化之所關苟不能安諧於厥家則何以觀
示於流俗兗國公主生而甚惠朕所鍾憐故於外家之近親以求
副車之善配而保傳無狀閨門失歡歷年于茲生事弗順達於聞
聽深所駭驚雖然恩義之常人所難斷至於賞罰之際朕安敢私
宜告大庭降從下國於戲惟肅雍以成美德惟柔順以輯令名乃
其恪思庶永來福

韓琦加恩制

王安石

朕祇率舊章肇稱吉禮對越天地具獲靈明之歆相維公卿並膺
休顯之賜其孚大號以寵元勳推誠保德崇仁守正協恭贊治亮
節佐運翊戴功臣淮南節度揚州管內觀察處置營田等使開府
儀同三司守司徒檢校太師兼侍中行揚州大都府長史上柱國
魏國公食邑一萬三千七百戶食實封五千戶韓琦躬受偉材出